

Naalakkersuisut Namminersorlutik Oqartussat aktiaateqarluni ingerlatseqatigiiffiutaanni akissarsiaqartitsisarnermut politikkiat pillugu kaajallaasitaq

Atuuffia

§ 1. Kaajallaasitaq manna Namminersorlutik Oqartussat aktiaateqarluni ingerlatseqatigiiffiutaanni siulersuisunut akissarsiassanik aalajangersaarnermut atuuppoq.

Akissarsiassanik inassuteqarnerit akuersissuteqarnerillu

§ 2. Namminersorlutik Oqartussat aktiaateqarluni ingerlatseqatigiiffiutaanni akissarsiassat qaffasissusaat kaajallaasitami ilanngussaq 1 malillugu Naalakkersuisunit aalajangersarneqartarput.

Imm. 2. Akissarsiat qaffasissusaat matumunngalu allannguutit ataatsimeersuarnermi akuerineqassapput.

Imm. 3. Naalakkersuisut pisuni immikkut ittuni, pissutsit tamatumunnga pissutissaqartitsippata akissarsiat qaffasissusaannit allannguutinik aalajangiisinnaapput.

Akissarsiassat annertussusissaannik aalajangersaasarnermut politikki

§ 3. Aktianik ingerlatseqatigiiffinni Namminersorlutik Oqartussat pigisaanni akissarsiat qaffasissusiisa ilaasortat inuussutissarsiutugalugu ilaasortaasut aamma piginnaasallit tigummiinnarneqarnissaat qulakkiissavaat aammalu piginnaasanik nutaanik ingerlatseqatigiiffinni siulersuisuini pisariaqartinneqartunik sulisussarsiornissamut tunngavissiiuussallutik. Taamatuttaaq akissarsiat kajumissuseqarnissamut siunissamik ungasinnerusumi aktiaateqarluni ingerlatseqatigiiffinni Namminersorlutik Oqartussat pigisaanni naleqarnerulersitsinissaq qulakkiissavaat.

Imm. 2. Akissarsiat qaffasissusiat siulersuisut akisussaaffiini, piginnaasaanni aamma piffissamik atuineranni takussuserneqassasut, taamaaliornikkut akissarsiat qaffasissusiat naammaginarloq unammillersinnaasorlu pigiinnarneqarsinnaammat.

Imm. 3. Suliat amerlanerulernerat tamatumalu kingunerisaanik siulersuisut siulittaasuannut, siulittaasumut tullersortimut aamma kukkunersuineramik ataatsimiititaliap sulineranut siulittaasumut aarlerinaatit annertunerulersut akissarsiatigut takuneqarsinnaassapput.

Imm. 4. Siulersuisunut akissarsiat suliat suugaluartulluunniit nalinginnaanerat aamma suliat annertussusiat sinnernagit kiisalu ingerlatseqatigiiffinni aningaasatigut inissisimaneq sinnerlugu amerlassuseqassanngillat.

Imm. 5. Akissarsiat qaffasissusaat ingerlatseqatigiiffinni allani assersuuffigineqarsinnaasuni qaffasissutsit naapertorlugit nalimmassarneqassapput, taamaaliornikkut akissarsiat qaffasissusaat suliffeqarfinni qaffasinnerpaajunnaarlugit.

Imm. 6. Akissarsiat qaffasissusaat Naatsorsueqqissaartarfiup januar 2008-mi naleqqersuummik 100-mik nioqqutissanut kiffartuussinernullu tamanut akinut kisitsit iluarsiissutaa malillugu ukiut tamaasa iluarsineqartarput. Iluarsiissut januarimut kisitsit akinut iluarsiissutaasoq malillugu naatsorsorneqartarpoq tusindenullu qaninnerpaanut akunnaallisarneqartarluni.

Akissarsiat allat

§ 4. Namminersorlutik Oqartussat aktiaateqarluni ingerlatseqatigiiffutaat Namminersorlutik Oqartussat akitaateqarluni ingerlatseqatigiiffutaanni siulersuisuni ilaasortanut akissarsiat aalajangersimasut saniatigut allanik akissarsiaqartitsisinnaangillat, taamaattoqli imm. 2 aamma 3 takukkit.

Imm. 2. Siulersuisut kukkunersuineranut isumannaallisaanermilluunniit ataatsimiititaliamik pilersitsisimappata, ataatsimiititaliami taamak ittumik ilaasortat, siulersuisuni ilaasortat nalinginnaasumik akissarsiaasa 15 %-iannik sinneqanngitsunik aalajangersimasunik tapeqartinneqarsinnaapput (ataatsimiititaliamiinnermi akissarsiat), taamaattoq tak. imm. 3.

Imm. 3. Kukkunersuineranut ataatsimiititaliami isumannaallisaanermulluunniit ataatsimiititaliami peqataanermi, ataatsimiititaliainnarni marloriaammik akissarsiaqartoqarsinnaanglaq.

Ukiumoortumik nalunaarusiami akissarsiat pillugit paasisutissat

§ 5. Ukiumoortumik nalunaarummi maannakkut siulersuisuusut aamma siulersuusimasut akissarsiaat tamaasa ingerlatseqatigiiffiit Namminersorlutik Oqartussanit pigineqartut tamarmik nalunaarutigissavaat.

Imm. 2. Ukiumoortumik nalunaarusiaq ingerlatseqatigiiffiup nittartagaani takuneqarsinnaassaaq.

Atuutilersinneqarnerani, ikaarsaarnermi, atorunnaarsitsinisamilu aalajangersakkat

§ 6. Kaajallaasitaq manna ulloq 1. juni 2024-mi atuutilissaaq.

Imm. 2. Kaajallaasitaq manna kaajallaasitaq atuutilernerata aalajangiiffigineqareerneratigut akissarsianut atuutilissaaq.

Imm. 3. Ilutigisaanik Naalakkersuisut Namminersorlutik Oqartussat aktiaateqarluni ingerlatseqatigiiffutaanni akissarsiaqartitsisarnermut politikkiat pillugu kaajallaasitaq nr. 51, 12. oktober 2023-merssoq atorunnaarpoq.

Naalakkersuisut Siulittaasuata Naalakkersuisoqarfia, ulloq maaji 6.-at, 2024

Kalistat Lund (atsior.)

Nunalerinermut, Imminut Pilersornermut, Nukissiutinut Avatangiisinullu Naalakkersuisoq

/ Hans-Peder Barlach Christensen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut